



30. september 2025

UKA2025/18

Uunga siunnersuut: Umiarsualivimmiinnermut aamma umiarsuarni takornarianik angallassisuni ilaasut akileraarutaat pillugit Inatsisartut inatsisaata allanngortinnera pillugu Inatsisartut inatsisaat.

(Aningaasaqarnermut Akileraartarnermullu Naalakkersuisoq)

Naalakkersuisut umiarsualivimmiinnermut aammalu umiarsuarni takornarissanut angallassisuni ilaasut akileraarutaat pillugit inatsisartut inatsisaannik allanngortitsinissaannut saqqummiussaannut Siumut sinnerlugu qujanaq.

Tamannalu pillugug Siumumiit imaattumik oqaaseqarfigissavarput.

Uuma inatsisip qaqinneqarneranut tunngaviuvoq Naalakkersuisut siorna Kangerlussuarmi umiarsualivimmik atuinnermut akileraarutip akiliutigineqartartup annertussusilerneqarnerani suliaqarsimanerminni akitsuutip Nuummi akitsuummut sanilliullugu allaanerusimaneranik tunngaveqartumik Naalakkersuisut Inatsisartut aningaasanut inatsimmi oqaasertaliussatigut aaqqiisoqapallannissaanik suliaqarsimane ilutigalugu matumuuna inatsisitigut aaqqiissutissartaa inissinneqalermat. Tassa Sikuki Nuuk Harbour A/S Kangerlussuarmi suliaqartussaalersinneqarnerata malitsigisaanik akitsuutitigut suliaqarsimanerit taamaasillutik matumani inatsisitigut suliarineqarnerat tunngaviuvoq.

Siumumiilli maluginiarparput Sikukip Nuuk Harbour A/S ingerlatsinera sinerissamut siammarnersaa ilaatigut inatsimmi ilaatinneqarnera Siumumiit isumaqarpugut tamanna mianerisassartaqartoq. Tassami ukioq 2015-imi upernaakkut 2015-imi immikkoortoq 71-imi partiiniit tamaniit isumaqatigiiffigineqartoq toqqammavigalugu allaqqasoq tunngavigalugu isumaqarpugut ataatsimiisitaliami eqqummaarikkumaartugut.

Illuatungaatigut aamma Siumumiit isumaqarpugut piginnittuunermut politikkimi aaliangersimasarput tassa suliffeqarfiit inuiaqatigiinniit pigineqartut kattussuutsinneqarnissaannut suliniutit sukkatsisarlugit Naalakkersuisut suliaqarnissaat kaammattuutigerusupparput. Siumumiimmi isumaqatigiissutit partiinit amerlanerussuteqarluartuniit kissaatigineqartut timitalersornissaat pingaartipparput naammassineqassasoq. Matumanilu Sikuki Nuuk Harbour Siumumiit isumaqarpugut Royal Arctic Line-ilu kattunnissaat pissusissamisuussasoq. Tamannami Siumumiit akisussaaffimmik tigummeqataanitsinni ingerlatsileriigaq naammassineqarnissaa pingaartutut suliarineqarnissaa matumuuna ersarissaqqikkusukkatsigu.

Nuummi umiatsiaararsortut aalisartut piniartullu minnerunngitsumillu KNAPK qaqilertuisarnera Siumumiit tusarnaaqqissaarsimasarput, pingaarutilinnillu oqariartuuteqartarsimaneri



tunngavigalugit ingerlatseqatigiiffiup katitigaanera allannguiffiusariaqartoq suliaralugu aallartissimasaq nangillugu ingerlaqqittariaqartoq Siumup pingaartippaa.

Akitsuutituut naleqqussaaneq tunngavimminni ajunngilaq. Taamaattorli Siumumiit akitsuutit annertussusilersorneqarsimanerisa nalilersuiffiguarnissaat pingaartipparput, isumaqaratta nunatsinni atuinerit annikippallaamik isaatsissutigineqartut. Taamaattumik tamakku pillugit aningaasanut inatsimmi siullermeerinninnermi kissaatigut ersarissumik apuuppagut aammalu aningaasanut inatsit pillugu isumaqatiginninniarnermi ilanngullugit Naalakkersuisunut apuunnikuullutigit. Siumumiimmi isumaqarpugut nunatta avataaneersut akiliutigisartagaat qaffasinnerusariaqartoq aamma tingerlaaserlutik tikittartut eqqarsaatigalugit.

Akiliutimmi tamakku nunatta innuttaasuinut minnerunngitsumillu nunaqarfinni isorliunerusuni aammalumi nunatsinni illoqarfinni talittarfigissaanernut iluaqutaalluassasoq Siumut isumaqarpoq.

Inatsisissatut siunnersuutit tunngavimminni paasinarput. Kisiannili inatsisit pilersinnissaanut tunngaviusut tunuliaqutaasullu ilanngullugit taamak oqaaseqarfigalutigit, suliaasaq Aningaasaqarnermut Akileraartarnermullu ataatsimiisitaliamut ingerlateqqipparput.

Qujanaq.

Erik Jensen
Siumut